

小有齋自娛集



小有齋自娛集



光緒六年  
刊於濟上

陶村公家傳

男順基  
順宣  
謹述

府君諱鈞字廣樂晚號陶村先大父遜齋公家子也幼穎悟好學諸子百家過目輒成誦見者咸以神童目之及冠隨先大父仕浙中佐筆翰先大父以科第期援例納粟歸應省試卽邀薦旣以先大父鐫移山左尹曹邑襄理會計精而敏其筆翰如流動中窾要他人雖分理之猶旁午紛紜屢告勞瘁而府君綽有餘閒賓僚皆驚先大父欲爲遵例納仕府君固遜乃請爲叔父訥園公援例逾歲先大父得肝疾以家貧故未遽告府君力請歸曰吾家世作吏而世寒素悉甘澹泊乃祖風也且實

家傳

一

有疾亦未可爲國馳驅兒能力養幸勿慮至是先大父遂陳情乞歸府君卽奔走衣食而甘旨豐潔未之或缺膺德州牧宋公講席旋游京師應試北闈名籍公卿間一時求文藝者日凡幾輩庚辰卷列首魁及僉榜時主司爲吾常某以嫌見擯旣而南返復應省試屢薦屢黜而府君坦如也先是入湘巖韓觀察講席凡十七年前後及門諸弟子登賢書膺顯仕者肩相比也而府君竟不獲售於是諸弟子咸憤懣溢於辭色府君慰之曰人能爲必售之技而不售固可以無憾矣且讀書初志僅博科第已乎設無科第將不讀書乎果爾便非眞讀書

者蓋求濟欲也今吾所失者其華所獲者其實吾誠有  
以自慰矣爾小子曷亦慰吾之慰而扼腕奚爲也爾其  
少安於是大江南北聞茲論者愈欽師道之尊矣配吾  
母王孺人生男五人存不肖兄弟二人女二長適乾隆  
庚午科舉人楊昌吳子庠生炳文次適廩貢生黃宗子  
邑庠生佩印府君性耿介有古士風不肖等旣及冠從  
侍館中府君誨之曰吾生平不求人知不受人憐所望  
於汝曹者惟安命勤學而已卒年六十有四歿之日親  
疎遠近莫不出涕蓋聞其風者歷久猶有餘感焉

家傳

小有齋自娛集目錄

古體

觀棋

刈稻感懷

世間幾許英俊多被舉業誤卻一生嘗縱觀貴客  
飢客種種情境因作儒冠誤以誌感

醉月

過忠肅于公故里

瘦馬行

神廟雙松歌

小有齋自娛集目錄

東坡洗硯池歌

祝張咫園先生七袞壽

題韓丈湘巖獻壽分丹圖

中秋夜飲放歌

輓唐遇伯

題吳月齋梅花小照

題姚子笠山小照

題二母舅幽篁坐嘯圖

近體

過橫山嶺

嶺上口占

天台道中

吳山演浣紗記有感

苦雨

喜晴

消暑雜題和鍾康廬韻四首

送王生仲寔二首

游過上舍楊園六首

金陵雜詠四首

送杜生明水

小齋自娛集目錄

遣興 寄友

海角村居

枕上作

送家二兄體仁赴浦陽幕

新竹

趵突泉用趙松雪原韻二首

題韓二鶴汀出釣圖

送王生仲寔挈眷歸祝兼就院試

贈蔣丈南伯

又疊前韻奉酬見和之作

留別宋氏昆仲

擬端五日賜衣二首

詠而歸

秋風

岳鄂王墓

于忠肅公墓

代和伍漢川黃鶴樓用崔韻二首

代和李江陵留別元韻送之潼關司馬任二首

游呂仙洞

贈住山僧

少齋自娛集目錄

門弟子陶生請隨行許之

講院右鄰文昌宮吳道士頗不俗扯以偕游

晚歸

題鍾處士松下撫琴遺照

三體

題岳墓前秦檜等鐵像二首

放鶴亭

和蔣六慎餘青霄里十二景元韻

題姚琴川山溪漁舍圖

步姚芝鄉韻贈武當韓得一鍊師四絕

久客

感夢口占六首

少齋自娛集目錄

四



小有齋自娛集

毘陵徐 鈞陶村氏著

古體

觀棋

天地布棋局到處開鬪爭智力究何有試看弈最明人  
座始揖讓俄焉旗鼓陳分疆畫攻守列陣羅星辰欺敵  
勝亦敗乘間死者生驟捷飛將軍野戰馳風雲森嚴細  
柳營泰山鎮乾坤盛氣探虎穴小心涉春冰得手一子  
先淋漓勢縱橫失算落旁門步步皆荊榛強弱初未分  
渺慮肆併吞兩心立劍戟四目攢楸枰小挫力愈努中  
小有齋自娛集  
一  
變神猝驚局終辨勝負餘思猶殷勤呼童埽殘兵黑白  
無留形借問當局人此際真誰贏

刈稻感懷

佳禾未逢時太倉一粒粟委之則泥沙植之勝珠玉帝  
憫毛血腥降種惠百族君相親栽培貴賤待樂育斯真  
不死草可倣返魂木周家八百年開基在樹穀俗情遇  
樂歲狼戾動盈掬亦思飢餓時粒米命堪續願得猛力  
人徧地種成熟總結納王庭閭閻盡食福

世間幾許英俊多被舉業誤卻一生嘗縱觀貴客  
飢客種種情境因作儒冠誤以誌感

琢玉製步搖良工惜刀鋸男兒攻舉業狂瞽走歧路由  
來四百載青紫憑尺素榮利醉羣心詞壇趨若鶩立身  
不復論能文卽其庶驅我普天人墮此十里霧稊子甫  
能言便令習操瓠雛鳥送籠中長亦癡如孺麥菽且不  
知物則是何具縱或稍聰慧暗室思向曙無奈父兄瞋  
也逐頽波去紛紛日伊唔之夫秉法度師友所切磋花  
樣怕襲故狼藉筆墨愁割裂經史怖騰口有五車視履  
無一句遂爾稱鳳麟居然竊鷓鴣靦顏稽古榮袖手經  
國務原不識皋夔借快恩仇簿就中輕薄兒素行彰眾  
惡旣貴動鄉閭一切總相怨那復計昏夜百醜目難寓  
小有齋自娛集

二

裕後謀更深及少早攀附塗鴉何必工高呼自雲步黃  
口笑由人傳家要紈綺還議子叔疑壟斷寵太固予愧  
未忘機開囊見書蠹寢食在一編子孫長此哺笑問渠  
眼底何曾辨經註緬想士林中飄零幾人遇班馬買絲  
繡王唐范金鑄構思急雨來落筆疑神助自號飛將軍  
亦每奇於數壯歲幸鄉舉銓除待垂暮需次三十年中  
壽木拱墓白首縱當官秋蟬吸朝露曳裾况布衣飛蓬  
集枯樹殘杯古所悲下坐今何處裘敝不知歸誰憐涸  
轍鮒捉襟扣豪門寒乞闈人怒戍卒尙瓜期孤僧亦常  
住獨爾棄室家頻年不一顧家中絕餽粥妻孥凍腰膞

不悟還寄書責子仍守兔差哉老病死客路骨誰耐昧  
昧我思之泗濱橫古渡移此蟣蝨勞當得羹牆晤胡爲  
作無益精力東流付厲階進士科禍首子虛賦最恨拗  
相公作俑將人綱君看浮雲多頓使青天污且看徑寸  
珠衣被輪尺布耕讀正生涯簞瓢有天趣窮達聽自然  
勿爲儒冠誤

醉月

白帝當昏掛玉玦青峯障天藏半壁客子山庭敗葉風  
吹徹羈腸正愁絕五陵裘馬多少年嗟我飢驅老牛褐  
寄箋幾度覓飛廉可笑姮娥似頑石我今對汝酌巨觴  
小有齋自娛集

三

一口吸盡星辰光酒兵酣戰破愁陣縱橫天地恣翱翔  
呼龍移桂種庭院遣兔拔毛供文章跨身汗漫不自量  
直探月窟尋唐皇醒來猶是脫塵垢乃知麴蘖眞良友  
廣寒仙藥任人求我但願乞瑤池酒更願銀河萬里長  
借向人世流瓊漿洗盡愁腸怨咨歇共醉清華太平月

過忠肅于公故里

白鳥夜呼啄大屋六龍北狩全軍覆鐵騎奔馳江海翻  
旋轉乾坤一忠肅忠肅經綸匹瑜亮剖出心肝奉君上  
寶鼎千鈞力獨扛洵濤萬頃誰同障軍國紛紛晝夜勤  
指麾井井風雲壯幾番拔劍斬天驕未許揮金贖仙仗

羌人自此窮伎倆上皇聞之轉惆悵豈知和議絕歸音  
徽欽曾受金人誑報國長披鄂王膺扶顛上掩汾陽烈  
雙手擎天洗甲兵孤忠貫日辭圭璧胡爲復辟聽奸人  
雲暗西曹血流碧亦思誰實婦妖氛奇貨安然返金闕  
以功爲罪日月昏孰如景帝分黑白天順山河竟若何  
于公故里猶留碣

瘦馬行

長安馬市日千匹就中瘦馬驢質皮毛剝落泥裹瘡  
氣骨崢嶸山立壁天廐眞龍世罕逢雲霧晦冥纔特出  
那知時俗尙癡肥三年入市無人識我來見之心愴然  
小有齋自娛集

四

王良伯樂空名實動稱善相驥不收駑駘偏控黃金勒  
終朝躑躅棄道旁飢來難覓生芻食見人俯首只吞聲  
獨立悲嘶苦伏櫪朝燕暮越願騰驤四蹄何自風雲入  
誰歟好者售千金買向華軒受拂拭電掣星馳萬里間  
方顯泥塗有神物

神廟雙松歌

東牟城隍廟卧松二株屈曲盤旋陰  
蓋滿院根已合抱而高止數尺洵是

絕世奇  
觀云

怪底連朝風雨重卻緣神廟虬龍鬪罷歸來不露形  
仍化雙松卧廊石陰稠滿院高及尋翠接虛簷色何秀  
偃蓋蟠曲藏清風亂戟橫攢走猛獸枝錯成椽屋宇寬

葉稀間漏日月瘦無故晴天吼巨雷似有仙鶴啼清晝  
知非鬼物守護牢早乘雲霧去巖岫小子由來好奇古  
到此相得渾遇舊踞坐松間見本根惆悵茲游只邂逅  
從今傳語畫松人勿畫胡僧畫學究

東坡洗硯池歌

用東坡龍尾硯韻

石池盈尺何足惜今古名高埒琮璧豈知蕩漾墨花濃  
蘇海餘波漬靈石坡公昔住常州時終朝椽筆揮宏辭  
爲借清泉洗綺語此意問池知不知鷺毛鼠鬚已塵垢  
龍尾鳳喙亦烏有奎星長炳九天文墨池留示千秋後  
輕漚細浪搖停雲綠苔文藻揚清塵當年重人非重石  
小有齋自娛集

五

後世見石如見人物今遇主豈知擇幸侍名賢承指畫  
瑰奇不讓米家珍風流甯與王家別

祝張咫園先生七袞壽

三十年前始識翁翁爲壯夫我成童三十年後爲翁壽  
我爲壯夫翁白首花晨月夕幾多春小園高臥羲皇人  
不雕不琢不衫履年雖古稀心赤子天君常奉百體從  
清于野鶴健于龍笑我年纔四十五敝矣筋骨不堪數  
盛年弗敵老年強知翁日月壺中長綠菊黃橙勝雪藕  
歲歲茲辰祝岡阜

題韓丈湘巖獻壽分丹圖

琴堂祥光何郁郁耀日烘雲豔羣目共驚起自八仙圖  
不道圖中迺骨肉功名唐宋推韓家靈壽尤多宰相麻  
宗風到今更昌熾青田福地森琪花伯兄膝前玉已四  
仲氏庭中桂復二渥注龍種方迭來阿閣鳳雛先列侍  
華筵晝錦重陽開一門長幼同徘徊菊酒正香桃正熟  
海榴新綻衣新裁釋奴成童知孝友率弟稱觥爲翁壽  
龍子偷桃方朔流先奉阿爺次阿母挽鬚奪菓歡何多  
長者吟詩幼者歌封胡邊末共跳舞持觴顧笑顏微醺  
此際蘭芽尙瑜珥轉眼簪冠卽金紫君家昔日忠憲翁  
八子童時亦如此傳語梁溪顧虎頭好圖冠佩烏衣游  
小有齋自娛集

六

荆花崢嶸大椿老萬六千歲爲春秋

中秋夜飲放歌

瞋帝行秋握白璧明璫玉佩繽紛列寶光散地堆玻璃  
照徹心脾最清絕此時海上翻銀濤三山宮闕明于雪  
馮夷擊鼓龍女歌羣仙高會歡何竭我亦呼朋紱客窗  
交梨雪藕酬佳節高談縱飲興浩然欲訪申公學神訣  
分花好向廣寒栽有酒還招素娥歡天上人間作一家  
兔走烏飛無二轍大千世界本光明祇怕浮雲翳純潔  
常收冰鏡著胸中逍遙何必游寥泬

輓唐遇伯

君八世祖太常公我六世祖同年友太常令子紹家聲

三十登瀛望山斗

太常公諱鶴徵與先少宰鄉榜同年公子諱倣純庶吉士

子淵無

祿文星墜我祖哭之淚盈缶

先少宰集有祭唐吉士文

君德堪承吉

士先君才不愧吉士後胡為造物太無情位置斯人更

不偶吉士逾壯君甫冠吉士有子君無婦吉士通籍君

一衿不信奇才定陽九我父昔游司馬門刺史孝廉相

得厚

大司馬薊門先生諱執玉刺史謂撫州守諱孝本孝廉諱少游俱薊門先生子也

尊人於

我成世交自幼識君堪大受問奇穎悟執禮恭出入百

家窮二酉恂恂訥訥氣量深英姿卓犖驚戶牖那知鵬

翮怯秋風

君入泮後竟成病卯秋未得與試旋卽下地

竟使芳蘭變衰柳最

小有齋自娛集



是椿萱苦斷腸病中心血猶密嘔

今夏抱病力學尊人禁之密藏稿篋中歿

後檢

少年踪跡尚浮雲况我將衰如敝筓君不哭我我

哭君放歌欲向蒼天叩蒼天茫茫不可知情長歌短君

知否

題吳月齋梅花小照

問君何似梅花清古心寂照寒潭明問君何以梅花瘦

奇情岫崑龍蛇走胸羅今古豈嫌貧看徹寒暄都是春

淡處鍊成高骨格靜中不染諸有塵世人只愛繁華好

誰識寒香香更早不見百花頭上詩織成一時偉抱推

王會

題姚子笠山小照

圖無他景  
身坐一石

錫山詞畫誇風流後有雲林前虎頭姚君天才躡芳趾  
口吟手抹無人儔笠澤之山七十二收入書窗作私宇  
煙波萬頃浮清光靈威片席傳真意草履青衫雲外踪  
何緣更著塵中容君不見東西馳逐汗浹背焉知坐石  
披涼風

題二母舅幽篁坐嘯圖

如看張薦竹明月清風滿深谷如聽伯牙琴高山流水  
爲知音幽踪自古空塵界於今並入先生畫杖履行從  
木石間煙霞未許簪纓攀何必彈冠更結綬自有鷗朋  
小有齋自娛集

八

與鹿友峯外青峯雲外雲起身長嘯臨無垠

近體

過橫山嶺

突兀撐遙碧層層類削成崖危千澗落路轉一山橫紆  
曲疑盤谷登臨恍太清浮雲連地闊古木接天平仰眺  
飛禽盡迴看磨蟻行蓬萊如可到從此問前程

嶺上口占

緩步登山頂層霄尺五通鳥飛平地上人住白雲中日  
月當頭近乾坤到眼空置身竄絕處不羨鹿皮翁

天台道中



欲識天台道千峯逐馬橫野花迷客路溪竹漾幽情寺  
跨山腰坐人從樹頂行藍橋知不遠何處訪雲英

吳山演浣紗記有感

一片夫差地嬌歌尙可尋西施眞面去伍相怒濤深檀  
板翻新調笙簧剩古音若知今日幻吳越罷相侵

苔雨

竟日飛梅雨經旬冷麥秋天光連地窄水氣接雲淨前  
路迷深霧新愁湧急流何時爽心目坐月醉南樓

喜晴

旭日排雲出和風拂樹輕窗開來遠岫溪漲泛新萍嫩  
小有齋自娛集

九

草如加染殘花整豔情隔離清韻發野鳥弄初晴

消暑雜題和鐘康廬韻四首

時館  
梁溪

官舍三年客炎天一室栖生涯垂翼鳥世路觸藩羝避  
暑渾無計分箋幸有題何當乘逸興載酒泛梁溪

天上秋期近人間雁影沈斷雲縈別浦斜月淡高林小  
酌情難遣清談興轉深良朋嘉會少莫問露華侵

徧覓招涼地何如寄暢園清池通遠脈古木翳晴軒徑  
曲行難盡峯孤勢亦尊煩襟于此滌相對坐忘言

費豈煩官隸狂應笑腐儒旣忘磻玉辨一任馬牛呼客  
路憑知己天涯守故吾新秋風雨後同訪石門無

送王生仲寔二首

不遇遠離別誰知聚首難明朝成契闊此夜且盤桓官  
閣故人少征衫客路寒趨庭堪計日好結綵衣歡

萍水知何定無爲恨此行正思期後會難遣別時情風  
雪前途滿蒹葭一水盈明年丹桂發側耳聽先聲

游過上舍楊園六首

園在蠡湖官上山於山麓障  
湖爲池約五六里路由池上

共說楊園好秋風一棹移野田沿嶺曲沙鳥過湖遲隔  
岸亭先見登隄路轉歧蒼茫雲水際投足欲何之

緩步登山頂亭浮水上天峯延七十二星摘萬三千遠

浦荒荒日中流點點船坐看雲際鶴長唳下松煙

小有齋自娛集

十

衡宇高低結縱橫就勢彎稻梁歸竹裏機杼織雲間軒  
浸半湖水樓開三面山何須訪林屋卽此是仙關

儼立蘇隄上分流作裏湖刺菱三四里疎柳萬千株小  
徑雙池夾孤村眾木扶入門書韻朗知有草元儒

彝鼎分牀列圖書滿架堆先生採藥去令子肅賓來爲  
我煩親串論文伴往回同游多浙彥吾欲問天台

賁茗烹鮮芰殷勤出餉賓解衣方列座斜日忽催人尙

負梅林約

梅林未到

姑抽蔣徑身歸帆空悵望回首阻煙津

金陵雜詠四首

燕子磯

燕子何年墜成山鎮急湍昂頭疑虎踞展翅比龍蟠右  
控潯陽險東趨海若寬江南磯第一莫作等閒看

太白樓

古今詩酒客孰與謫仙京墓骨雖同朽江樓獨著名匡  
峨標勝概華岱想芳聲試看蕭君畫先生品自明

鷄鳴山

劫灰凡幾度蕭寺記當初一片臺城地千秋佛子居鷄  
鳴應似昔鳳闕早無餘只有山前鳥年年弔故墟

雨花臺

在昔天曾雨於今草似花臺荒留徑窄山走帶江斜亦  
小有齋自娛集

十一

有聽經客時來賣酒家問誰能說法空此對春華

送杜生明水

去矣趨庭急來時已半年鶯花迎客棹風雪送歸鞭樽  
酒從今隔停雲此後牽相期惟努力健翮好摩天

遣興

寄友

愧非高士偏憐酒喚作書生合耐貧天闊任從翔鳥羽  
泥蟠幾見老龍鱗一蓑風雨雲溪月萬里煙花閬苑春  
寄語停盃杜潦倒杜工部有潦  
倒停盃之句莫教翹蘖屬他人

海角村居

青屏遙亘白雲連海氣環村別有天久客蛟龍亦鄰里

得錢酒食便神仙閒穿柳岸觀魚立倦倚風窗伴竹眠  
興到會當騎野鶴直尋三鳥問桑田

枕上作

滾滾風濤萬馬行客懷驚晤夢無因新霜撲被寒於鐵  
殘月穿簾影到身夜靜一腔惟貯火酒醒百事竟欺人  
窮愁未得并州翦欲借江流洗賤貧

送家二兄體仁赴浦陽幕

入詠樓頭共夕晨於今君獨歷江濱幾番魂夢隨春草  
一路山川識故人魚鳥喜迎曾宿客簿書嗔見舊時塵  
幕中多少傷心事長夜殘燈伴隻身

小有齋自娛集

五

新竹

乍解黃苞吐綠筒出身便欲拂雲中漫言老去凌寒雪  
試看初來御暖風勁節一生從此植清光他日許誰同  
裁冠會向明時用六逸何曾是主翁

釣突泉用趙松雪原韻二首

歷下城西南隅平地  
出三泉陡立尋尺連

如貫珠眞  
異境也

地爲迎仙

迎仙橋在  
泉西里許

創絕無瓊漿疊疊泛冰壺光搖琪

樹花誰粲迹幻神山海不枯帶濕台星出河漢飛聲峽  
水走江湖到來頓覺凡襟滌漫道浮槎事竟孤

觀瀾到此世間無恍見三才在一壺奇偶生心看變化

滄桑經眼識榮枯居然博望游霄漢不羨知章賜鏡湖  
幽興從今訂風雨肯教松鶴伴泉孤

題韓二鶴汀出釣圖

不羨不笠不羊裘不向沮洳漫下釣肩上一竿擔日月  
腳跟雙屣撇公侯石梁恍接鼉梁近雲嶠還通海嶠幽  
我亦荆溪垂釣者倩君攜入畫圖游

送王生仲寔挈眷歸祝兼就院試

寒窗昨共校書勤遠浦今看別袂分梁案載歸吳地月  
萊衣裁出越山雲籌添鶴算宜高宴鼎揭龍文擬冠軍  
可憶草元亭畔草每逢風雨卻思君

小有齋自娛集

十三

贈蔣丈南伯

屈指前型已渺茫尙餘公琰卧維揚盛名久矣高於斗  
老性猶然辣似薑兩漢之間覘氣節八家以上論文章  
沈淪我亦羊求侶可許忘年附末光

又疊前韻奉酬見和之作

耆英誰道竟茫茫七十先生尙奮揚甘節自餘垂老蔗  
熱腸還有禦寒薑萍踪喜得陪前席椽筆欣承錫報章  
愧我舌耕成底事願從三徑領清光

留別宋氏昆仲

十年兄弟隔參辰一載燕齊共夕晨舊鏡積塵慚作鑿

新硯發刃喜如神病魔遣我無停轍雲路期君早致身  
轉眼春風消息好郊祁籍籍慰離人

擬端五日賜衣

二首得章字

午日涼生白玉堂輕羅疊雪展龍章五銖錫出裁雲巧  
百體恩霑化日長綵縷詎堪供補袞薰風恰喜奏垂裳  
中天最是明良會作服千秋照鷺行

紫殿雲開午日長仙衣新賜下鸕行金梭解是天孫織  
玉尺還疑月姊量捧去佩搖紈扇影著來風漾御爐香  
不材愧荷君恩寵永矢匪躬作報章

詠而歸

小有齋自娛集

十四

放懷不覺高歌起乘興還教挈伴歸可意陽春留晚照  
無心流水任鷗飛林間鶯囀酬天籟雲外風回送客衣  
到得城南各分手杏花壇上月霏微

秋風

白雲飛處裔颿起動竹穿林徧地涼暗入綺窗清枕簟  
突來書案發丹黃直教團扇常生戚未許寒蟬再作狂  
草木莫愁搖落盡晚成蘭桂更留香

岳鄂王墓

太息當年事事昏將軍誰與轉乾坤黃龍獨切君臣誼  
紫禁偏忘父子恩三字獄成資敵國兩河腸斷泣忠魂

可憐二帝埋荒徼不及孤山有墓門

于忠肅公墓

廟社非公隻手擎燕城早作汴梁城南宮幸免徽欽辱  
西市翻將郭李傾爲計七年原獨立縱酬千戶已捐生  
欲知後代幽光發南北高風亘古清

代和伍漢川黃鶴樓用崔韻二首

當年黃鶴誰騎去今日空教仰畫樓見說神仙偏寂寂  
無心江水自悠悠鳳凰北指雲中路鳳凰山去樓數里鸚鵡南

飛檻外洲只有金樽堪對月同銷萬古不知愁

大觀自古雄全楚

樓中顏云全楚大觀

幾度披襟坐是樓簾捲白

小有齋自娛集

五

雲風細細花飛玉笛水悠悠斜陽自照亭前石

樓西有日照亭

芳草難尋江上洲

時爲江水所漲

說到子安騎鶴處銜盃長嘯

破羈愁

代和李江陵留別元韻送之潼關司馬任

遮道依依駟馬遲楚關父老怨瓜期謫仙浩氣凌青漢  
生佛前身本赤髻麥秀方城馴雉日春深寒谷聽鶯時  
西郊速我龔黃駕千古棠陰去後思

斯民魚釜嘗歌范况我龍門久識荆荀子舊因爲御重  
祖生先見著鞭輕于今紫陌雙旌引此去青雲萬里行  
文鹿夾車佳氣擁遜聽竹帛紀高名

游呂仙洞

翠嶺遙峯聳翠鬢偶然執策往躋攀清幽似過山陰道  
峻險如登函谷關起伏難窮龍脉遠欽崎不惜馬蹄艱  
到來坐嘯神仙府頃刻胸中俗慮刪

贈住山僧

洞裏幽深境最奇純陽去後老僧羈雲封丹竈苔痕古  
月照禪牀松影移時煮清泉堪解渴慣烹白石可忘飢  
况能晤得空中實成佛成仙總有期僧名映山於洞中設禪牀跌坐有年  
矣乞余書眞空實在四字自言參晤出來余喜其釋能通儒卽書以贈

門弟子陶生請隨行許之

小有齋自娛集

十六

莫言童子竟何知亦解從游不肯師策蹇追隨添逸興  
攀蘿踴躍見天資山容聳拔文如是洞徑幽深理若斯  
一路相扶頻指點料應勝誦許多詩陶生名詩故云

講院右鄰文昌宮吳道子頗不俗扯以偕游

洞中三教適相逢此度遨遊趣不同道侶忽來參佛像  
儒生偏喜謁仙宮羽衣拂處塵埃遠塵尾揮時議論空  
我亦名心從此淡且烹石乳聽松風

晚歸

蕭寺鐘聲出晚菘寒鴉點點宿深叢僕夫况瘁催歸騎  
山徑盤紆滯客聽霧氣低含迷碧嶂月光斜照見丹楓



板橋一渡城堙近回首湖濱漁火紅

題鍾處士松下撫琴遺照

三體

有酒何妨醉攜琴可不彈雲巖松徑裏誰似碩人寬  
隨意來松下披襟迴出塵琴樽多暇日嵇阮是前身貌  
挹千峯秀胸回萬壑春試聽雲外鶴鳴和自相因

姓名四長曾爲最踪跡三高豈不如學道但依環堵室  
療飢自有滿牀書琴樽當日追元亮邛壑于今想幼輿  
古貌端然留尺幅松風猶是襲衣裾

題岳墓前秦檜等鐵像二首

乾坤雖大迨無君何地容他鼠一羣堪笑世人無見識

小有齋自娛集

七

反教奸佞污王墳

無知頑鐵也傷心鑄就奸臣穢不禁跪到海枯難歇足  
朝朝嘲罵聽山禽

放鶴亭

粉飾于今境已非蕙蘭長自吐芳菲漁舟昨夜亭前宿  
猶見朝天獨鶴歸

和蔣六慎餘青霄里十二景元韻

采菱渡

元卿三徑野橋東渡口閒雲鎖落虹最好夏來新雨漲  
菱歌四起一溪風

楊柳灣

灣頭新柳綠雲遮  
汁染君家棣鄂花  
剩取餘陰蔭漁子  
得魚常聽笑聲啞

竹塢

春花秋月媚晴塘  
竹塢深藏小院涼  
借問辟疆園內主  
可容狂客自相羊

松岡

平岡一帶老松高  
煙霧層層捲翠濤  
若使明通構樓閣  
華陽未許獨稱豪

桃蹊

小有齋自娛集

六

公門化雨廣滋培  
曾取天桃次第栽  
蹊上只今餘澤在  
繁紅猶是向春開

菜畦

灌園遺法我曾求  
抱甕欣看杞菊抽  
君是承明高貴客  
拔葵應得似公休

藕塘

一泓清澈俯階除  
淨洗芙蓉透綠渠  
閭井欲知君子面  
露珠圓處日生初

青雲社

里閭從來迓土神  
只聞曲逆發酬新  
如君意氣今無兩

正是青雲社裏人

觀稼軒

盛世嘉謨首服耕幽風常入管弦聲暫教稼部親民瘼  
坐看田家課雨晴

帆影亭

亭子遙臨一水孤往來南北路非迂不材每掛蒲帆過  
影入君家眼底無

蒹葭書屋

雨綻蒹葭分外肥一畦開處露雙扉書聲夜起清于水  
驚醒羣鷗亂欲飛

小有齋自娛集

花雨禪房

七

借問雲光住此麼雨花何似石城多生平也愛依蓮社  
倘許從游試一過

題姚琴川山溪漁舍圖并贈

山外青山溪外溪數間茅屋柳陰西漁人笑指雲深處  
別有仙家采藥蹊

琴川有采藥小照

步姚芝鄉韻贈武當韓得一鍊師四絕

本是元宮鳳與麟暫隨楚水踏吳塵天台儘有長生藥

採得靈芝幾樹春

韓自武當游天台結壇金匱

違山曾聽蟋蟀歌

韓幼師天台齊巨山齊儒者也

底事思航弱水波壁

上分明旗鼓在是誰爲鶴是誰驚

泰山道士紀吾名

昔泰山有道士與余同名

夙世疑餐紫石瑛堪笑

近來迂腐甚吟詩不似步虛聲

棕鞋來往逐飛霞開落桃源洞口花七十二峯峯不正

正峯高處路無叉

韓云桃源洞在武當武當七十二峯俱朝正頂

### 久客

久客如僧攪肺肝夢中幸得片時安那堪鷄犬渾無賴

叫轉鄉魂月正寒

### 感夢口占

乙未秋日

寂寂孤燈祇自憐與君永訣十餘年從來夢斷今頻見

小有齋自娛集

三

何故相逢總默然

平生甘苦祇含情恐惹愁人百緒縈更爲老年悲不得

到今夢裏也吞聲

憶昔從親客遠方獨留少婦奉萱堂那堪織紵辛勤日

弱息頻推痛阿孃

嗟予衣食走謀生累汝膏肓病久成顧影自思還自恨

何如十畝守春耕

卅年琴瑟靜如賓屈指相依未十春清白家風荆布少

臨終留得一懸鶉

報君兒女昔垂髫婚嫁于今恨可銷我亦風塵雙鬢白

九泉相見定非遙

小有齋自娛集終

三

跋

吾家先世遺集自遭兵燹蕩焉無存惟 高高祖遜

齋公所著偶筆二卷畫溪詩稿一冊家傳九篇 高祖

陶村公小有齋自娛集一卷爲 墳 童年所鈔錄謹藏行

篋幸未墜於播遷片羽吉光式憑斯在今春屬有剗剗

之役亟登諸梓以冀流傳且使我子孫展卷興懷無忘

先澤云

光緒六年歲次庚辰九月 日五世孫墳謹識

跋

